

እብራውያን መኒሃ ከተበሞ ሶህኑተ ኣጉሰ

ት ሶህኑተ ከተበንቶኢሁ አቡ ኦደንሹ እሌሰቤቺሃ እመዕነቱሰ አጉርቶተ ሆንጠንኮ እመዕናኖታት እቅ፤ ከተቦሲሁ እብራውያኖ እመዕናኖተ ተፈገጥሲሳንክዕኔሁ መሲህ ኢሰ ሀንቀኘለክ መጨረሽ መገን ለሉ እሁሰ ለሊሲኒት። ሁኩ እመዕናኑት እመዕነቲንከሰ ጠረኝታገ አእኖስ፤ ህካን አእኖ ወክት ሰሉ ሀንቅ እኮ ጠወ ጌጥ አዕይ ለሊሰኖ፡-

1. ቶሳ ኦርሻን አኒሃሰ መገኒሃ ሀንቅንክ አዘዘሞ ኢሰ ጉዕመ ዘማኒንክ መገንዩ ቤቱ፤ መገን ቤቱ እሆንከሰ ኑባቾ ወኣድ ላገ ነብያኖች፡ መሲቶለክ መላይካች ሎረሃን።
2. ኢሰ ኑባቾ ወኣድ ላገ ቂሳች በትሽ ጉዕመ ዘማን ቂሳቹ እሁሰ መገኑ ገውንኩሰ ጠወዕዮኡ።
3. ኢሰ አዲን እመዕናኑት ጨብቺ፡ ዋጅቶለክ ሬሆች ጡምታኢ፤ ኢሰ ሎረ ቂሳቹ እሆንከሰ እብራውያኖ አፎ ጠወኣ እመዕናኖ ሴሪንለክ ግዝ ክትመ ሆንጠህሱ ሀሌገ ለለኖ ጡሙ ሀንቅ እሀኖገ አዕዮኡ።

ከተቦሁ እሰረኤል ሄሶን ሱዕመንቶ መናከተ እመዕነቱሰ ሞሳልተ አዕይ (ፎሎ. 11) አነበባእሩ እመዕነቶንከሰ ጠረኝቶተ ቃግሰኖሰ፤ ህትን ፎሎ. 12 አነበባእሩ እልሰ ኢሰ አሌን ቱክ ይት እመዕነቶንከሰ ጠረኝቶተለክ እኮሰ ኦርሸቲ እልቶሰገሬ አደጽቶተ ሸዘኖሰ፤ መጨረሻን ሸዘነተለክ አገዕር ላገተ ኣሲ ጡፈኖ።

መጻፋስ አፎሃ

መሲህ መገኑ ኑር አዕይ ለሊሰኖሃ እሁሰ (1፡1-3)

መሲህ መላይካች ሎረ እሁሰ (1፡4—2፡18)

መሲህ መሲቶለክ ኢያሶች ሎረ እሁሰ (3፡1—4፡13)

መሲህ ቂሲች በተኡሰ (4፡14—7፡28)

መሲህ ወኣድ ላገት ሎረ እሁሰ (8፡1—9፡22)

መሲህ ክትመ ሆንጠህሲች በተአኖሃ እሁሰ (9፡23—10፡39)

እመዕነት ሎርመተ (11፡1—12፡29)

መገኑ መንዲሰሱ (13፡1-19)

መጨረሻ ዱኣ (13፡20-21)

መጨረሻ (13፡22-25)

መገኑ ቤትሰ አዲን ጠወዕዮገ

1 ብሬ ዘማኔን መገኑ ልግብ አደደ እኮ ዋቃን አበናኖተኔ ነብያኖ አዲን ልግብ ወክት ጠወዕዮ እቅ።

2 እኮጎሬ ከን መጨረሻ ዘማኔን ጉዕመንከ ረገአኖሃ አዕዮሰ ቤትሰ አዲን ኔሳሃ ጠወዕዮኔ። ህትን ጉዕመንከ ከለቆሁ እሰ አዲንት።

3 ቤቱሰ መገን ኬዕምኝ ለሊሰኖሃን፤ እሰን ዊመ ዊሚን መገኑ አጉደኖሃን፤ ወልቀት ዮ ላጋንከሰ ጉዕመንከ ድክሽ አፎኡ፤ ህትን መነ ጨቢቶ ነጠ አዕዮች ኤተሮን ሎረ መገን መኬ አዲን ሰማን አፋዕልዮኡ።

ኢሰ መላይካች ሎረ እሁሰ

4 መገን ቤቱ መላይከ ሱዕሚች ሎሩ ሱዕሙ ኣሰሞሰ ሃሊን እሳች በትሽ በተዕዮሃ እኮ።

5 መሰንትሰ መገኑ መላይካችሰ መቲሀሲ

«አት ቤቱሃኤ፤ አን አናክ»

ህከረንገ

«አን አን እሃንሰ፤ እሲሁ ቤቱእ እሀኖ»

ዬኢሁ አዬህት?

6 ህትን ሀንገፈ ቤቱሰ ኣዲንያ አል ኤቦ ወክት

«መገን መላይከት ጉዕሙንኩ እሲሃ ሰገደሰተ» ሀሰሰኖ።

7 እኮጎሬ መላይከተኔሃ ጠወእን

«መላይከሰ ቦብረ፥ ካዲመተ ጊረ ለበነተ አእኖ» ዮኖ።

8 ጠው እኮጎሬ ቤትሰተኔሃ፤

«መገኖ! ዳቕመክ ቦርጭመት ዘላለሚሃ ሄኣኣ።

ዋምነቶንከክ ጡመገ አት ገሽታንት፤

9 አት ፈዩተ ኢትት ሂለ ጠወ ግቦንት፤

ህከን መሳን መገኑ መጠሮሄ፤

ሙንዲኑተ ኣሰኖ ዘይተ ቡር ጃላችክ በትሽ ኢቱሄ» ዮኖ።

10 ቲሁ ቤትሰተኔሃ ህት ዮኖ፤

«ቀርቾ! አት ሄጭት ኡለተ ከለቆንት፤

ሰሞንኩ አንገክተ ሆጉ።

11 እሰ ጉዕሙንኩሰ በኣኣ፤

እኮጎሬ አት ሄላንት፤

እሰ ጉዕሙንኩሰ ኦድኖገ ኑባጽታአ።

12 ቡሉኮገን ጣጣንትሰ፤

እሰ ኦድኖገን ዶረንታአ።

2 አት ጉዕሙ ወክትንከ አቲት፤

ዘማኑክ ሆሮ ጎፈኖበአ» የኖ።

13 ጠው እኮጎሬ መገኑ መላይከ በሊች፤

«ባለጋረክ ሎካችክ ዋርን አኦተ ኢለ

መኬእ አዲን አፋዕል» ዬኢሁ አዬት?

14 ህከረ መላይከት ጉዕሙንኩ ጡሙ ደእታ መነ ካደንቶተ ሶህንቶ አያናከተበእንዶ?

2

ቀርቾን አመዕኔን ጡምተኔሃ

1 አይደጎ ነኡ ሞጮጮኖም ጠዊች ኤተሩ ዋልን ኡምባምበእገ አገዕሩ ሀሰሰኖ።

2 መላይከ አዲን ኩለንቶ ላገት ሀንቂተ እኮጎሬ ህተ ላገተ ቶጉ ግባኖ መንቹ ሀሰሰኖ ሃሊን ቀጠአመኖሃ እኮጎሬ

3 ነኡ ህከ ሎረ ጡሙ ሀምቦምጎሬ ህት እንክ ፋሽእኖተ አታልናም? ከ ጡሙኔ ወዕና ኩሎኔሁ ቀርቹ ገዋሰ፤ ህካን ጠረኝሰ ኩልቶኔሩ እሲች ሞጮጮቶእሃ መነ።

4 ህትን መገኑሁ ህከን ጡምተኔሃ መላተ፤ አበ አጀብሲሰኖ ሆጎን፤ አደደ ገረምሲጮኖ ጠዊን፤ እሰ ሀሾ ሃሊን ኣሴ ጠሊሊ አያን አሰቶን መሰከርኤ።

መን ዘሬተ ጡምሳንቹ ኢሰ እሁሰ

5 ነኡ «ከ ኤተሩ አሜታአ» ይን ጠወዕናም ኣዱንያ አል መገኑ መላይከሰ ጠቅቶተ ኣሰኖበአ።

6 መጻፍ ኣዜን መቶ ቤቾን መቱ መንቹ «አት እሱ ሰው ይቶተ መኑ መርቾሃን?

ህትን ጨነቀንቶሰተ መን እለት መርቾሃን?

7 እሱንከ መላይካች ቀዋ ወክተሃ ሆፍሶንትሰ፤

ኬዕምኣለከ ገለት ዘወደሃ ዋርቶንትሰ፤

አንገክ ሆጎ አሊንን መክሶንትሰ፤ *

1:12 መዝ. 102፥25-27። 1:13 መዝ. 110፥1። * 2:7 መት-መቱ ፍሳረት «አንገክ ሆጎን ዳኛ አቶንት» የኖሃ በርግታአ።

8 መገኑ ጉዕመርቹንከ ሹምነቲችሰ ዋርን አቶንት» ህት ይመስከርኤ።

ጉዕመርቹንከ ደቐመስ ኣዜን አአኖረ፤ ዳቕማሰ ኣዜን አኡዕነ ፌሾርቹ መቱርቹሁ ዮበኦ። እኮጎሬ ቱሱ ጉዕመርቹንኩ እሰ ሹምነት ኣዜን አሁሰ ለዕኖምበኦ።

9 ጠው እኮጎሬ መገን ኣሰቶን ጉዕማንከ መንተኔ ሬሁተ ለዕኖተ ቀዋ ወክቲን መላይካች ዋር አዲን እክ ለሌ ኢሰ ሬሆ ኦርሸተ ቶጎቤቹሃ ኬዕምኣለከ ገለት ዘውደ ዋርሃ ለዕኖም። እሰ መገን ኣሰቶን ጉዕምነተኔሃ ሬዮኡ።

10 መገኑ ጉዕመርቹንከ ከለቆ፤ ጉዕመርቹንኩ ህትን ሄኦተ አዕዮ፤ ኢሰ ኦርሸ ኣዜን ህግሲን ጉዕመርቹሃ በቀዕዮሃ አህኖገ አኡ እሲሃ ገበኣኑሃን፤ መነ ጡምቤቹ አዎንሰኖሁለከ ልግብ ኦሱተ መገን ኬዕምኣ ቤቀንታገ አአኖሁ ኢሳት።

11 መነ ጠሊላኦተ አአኖሳሁለከ እሶን ጠሊላኦተ እኮ መኑ መቶ አንተ ኦሱ፤ ህከን መሳን ኢሰ እሰንተ «አመኤ ኦሶ» ይ ገኦተ ሙለኖበኦ።

12 ህካን እኮቤቹሃ እን መገኒሃ

«ሱዕመክ አመኤ ኦሶተ ኩላም፤

አመዕኖኖ ጭምት በላን ኬሳሃ ገለትጫንኬ» ዮኖ።

13 ህትን «አመዕነቱኤ እሰ አሌን አኣም»

ህትን «አንለከ መገኑ ኣሴኤ ኦሱት ሁኩዕኦን» ዮኖ።

14 ኦሱት ማሉለከ ቁጉ ዮእረ እኮገን ኢሰሁ እሰገን መንቹ እኮ፤ ሁኩንን ሬሆንከሰ ሬሆ አሌን ወልቀት ዮሰ እልቢሰ ቤሶታት።

15 ህትን ሄአኖ ዘማኔን ጉዕማንን ሬሆገ ዋጄኖ ርሶመ ኣዜን ጠገንቶረ ጉዕመንከ ዋዝሃት።

16 ህንቅ አህኖረ ኢሰ ሀሾ መላይከተ ሀዕሎተ አሁዕነ አብራሂም ዘርተ ሀዕሎታት።

17 ህካን እኮቤቹሃ ማርቱተ አአኖለከ አመዕነም ሎረ ቂሰቹ እክ መገኒሃ አኦተለከ መን ጨብ አጉርተ መ ጠዋኒ አመሰ ኦሱተ አጉዱ ገበዕዮሰ።

18 እሰ ገዉንኩሰ ፌተነም ኦርሸተ ቶጎቤቹሃለከ ፌተነምቤቹሃ ፌተኖን ኣጋእረ ሀዕሎተ አታለኖ።

3

ኢሰ ሙሲች ሎረ እሁሰ

1 ህካን እኮቤቹሃ ሰሜ ጄነትሃ ገአንቴን ቤቀማኑተ እኬንተ ጠሊላኑት አመኤ ኦሶ! ጠወዕናም አመዕነት ሎረ ቂሰቹ እሆተ መገኒን ሶህሞ ኢሰ ሰዉ ይዬ።

2 ሙሰ ዱእ ምኒ ሆጎን ጉዕማን አመዕነሞኢሃ እኮገን ኢሲሁ እሱ ሾሞሰ መገኒሃ አመዕነሞኢሃ እቅ።

3 ምኒ እጃረኖሁ ምኒች ሎሩ ኬዕምኙ ሄአኖሰህንገን ኢሲሃ ሙሰ ኬዕምኚች በተአኖ ኬዕምኙ ሀሰሰኖሰ።

4 መሰንትሰ ምኒሃ ጉዕማንከ መቱ እጃረኖሁ ሄአኖ፤ ጠዉ እኮጎሬ ጉዕመርቹንከ እጃረሁ መገኑሃን።

5 ሙሰ ከ ኤተሩ ኩለመኖ ጠዉሃ ምሰክር እሆተ መገን ምኒን ጉዕማን ካድንችገ እክ አመዕነሞኢሃ እቅ።

6 መሲህ መገን ምኒን ጉዕማን ሹምነቱ ኣሰሞሰ ቤትገ አመዕነሞሃ እቅ፤ ነኡን አመዕነናምለክ ድከዕናም ተብሳሃ ኤተሩ ኢለ ጠረኝንሰ እንፎምጎሬ እሰ ምኒ እንካም።

መገን ኡመቲሃ ኣሰሞ አገዕርተኔሃ

7 ህካን እኮቤቹሃ ጠሊሉ አያኑ

«ከበር ላገሰ ሞጮጭቴነን

8 አዕኑ ኡለ ኡድማን ፊተንቴንተኤ ወክት አበናኑክዕኔ ሾክቶኤገን

ቀልብክዕኔ ዱድሶኖቹ።

9 ህከኔን አበናኑክዕኔ ፊተንቶኤሁ፥ አሙዕርሲሶኤሁ፤

አዕዮምርቹንከ ሸይሉ ዘማን ለኦኡ» ኖኖ መገኑ።

10 «ህካን እኮቤቹሃ እን ህከን ዘማን መናን ኡሙዕሬም፤

ጉዕመ ወክት ቀልቡሰ ሉጨሞኢሃ፥

ዎቃንከኤ ደግበረሁ» ይሞ።»

11 እንን አሙዕሬን

«እሰ ኢ ፎሎጮቤቹ ሆሮ ኣጋባኦ» ይ

ጤሌዕሌም።»

12 ኢ ጃላ! ዘላለሚሃ ሄአኖ መገኑ ለገእሲሰኖ ሂሉ አመዕነቡ ቀልቡ ክዕኔኤች አዩሃ ሄአኖበእገ አገዕርዬ።

13 እኮጎሬ ክዕኔኤች አዩሁ ጨቢን ጣንሰም ቀልብሰ ዱድሱዕነ «ከበር» የመሞ በሩ ጎፋዕነ ጉዕመ ወክት ገገዉክዕኔ እማዕለሜ።

14 ወዕና ሄዕዮኔ አመዕነቱ መጨረሻ ኢለ ጠረኝንሰ እንፎምጎሬ መሲህን ሜጡብ ቤቀማምረ እንካም።

15 ከኒች ብርተ

«ከበር ላገሰ ሞጮጭቴነን

ህክ ወክት አበናኑክዕኔ ሾክማን አቶገን ቀልብክዕኔ ዲድሶኖቼ»
የመሞ ከተበሞጋት።

16 ላገሰ ሞጮጭት ሾክቶእሩ አዩኤታን? ሙሰ አዎንሰ ግብጽ ባዲች ፋሼሰሩ ጉዕማንከሰበእንድ?

17 ሸይሉ ዘማን ዊመ መገኑ አሙዕርሰሶሩ አዩኤታን? ጨብ አቶቤቺሃ ጀናዘሰ ኡለ ኡድማን ፈቆእረበእንድ?

18 ህካን እኮቤቺሃ አዘዘንቶበእ መን ቤሉ «ፎሎጮኤ ቤቹ አገነነተበእ» ይ መገኑ ጠሌዕሌሰሩ አዩኤታን?

19 ቲሁ እሰ አመዕኑ ሆኅ መሳን ፎሎጮቤቹ ኣኅተ አታሉ ሆጉሰ ደንጋሞ።

4

1 ህካን እኮቤቺሃ ኣሰኖኔ ፎሎጮቤቹ ኣገሃ ላገተ ኣኅኔሁ ጠረኝ እኮቤቺሃ ክዕኔች አዩሁ ህክ ፎሎጮቤቹ ኣገኖ ሳመ ደኡዕነ ፈቀኖበእገ ጉዕሙኅኩኔ አገዕርኖ።

2 እሳሃ እንጂል ላገት ኩለንቶገን ኔሳሃ ኩለንቶኔ፤ ጠዉ እኮኅሬ እሰ ሞጮጭቶ ላገተ አመዕነቲን ቶጉሆኅቤቺሃ ደግለሎሰበእ።

3 ነኡ አመዕነኖሞ መኑ ህክ መገኑ ኣሰኖኔ ፎሎጮቤቹ አንጋሞ፤ እሰን «እሰ ፎሎጮቤቹ ሆሮ ኣጋበእ» ይ ኡሙዕሬን ጠሌዕሌሞ» ዩሀንገን ት ሆጉት ኣዲንያት ከለቀንቶች ኬሽ እክ ኅፎኡ።

4 ቲሁ ጠሊለ መጻፍ ኣዜን መቶ ቤቸን ለመልቅ በርተኔሃ «መገኑ ለመልቅ በር ሆኅቸሰ ጉዕሚቸን ፎሎጮኡ» የመሞ ከተበሞኡ።

5 ህትን ወዕና የመሞገን ለንኪሃ
«ፎሎጮኤቤቹኤ ሆሮ ኣጋበእ» የኖ።

6 ሁኩ ዎዕነ እንጂል ላገት ዲዲብሰንታንሰ አዘዘሙ ግብእሩ ፎሎጮኤ ቤቹ ኣኅበእ፤ ጠዉ እኮኅሬ ህክ ቤቹ ኣጋ መት-መቱ መኑ ሄኡሰ ሀንቅሃን።

7 ሁኩን ሄጮ የመሞገን

«ከበር ላገሰ ሞጮጭቲን
ቀልብክዕኔ ዲድሶኖቼ»

ይ መገኑ እሰ ዘማኒቸ ኤተሮን ደዉዴን ጠወዕኖ ላገት «ከበር» ዩኖ መቱ በር ወሰኛኡ።

8 ኢያሱ ፎሎጮሾስ እቃን መገኑ ለንኪሃ ዋሎ በርተኔ ጠወአኖበአ እቅ።

9 መገን ኡመቲሃ አበ በሬ ፎሎጬ አጉደኖ ፎሎጬ ከ ኤተሩ እሀኖ።

10 ህትን መገን ፎሎጮቤቹ አገኖሁ አዪሁ መገኑ ሆጎችሰ ፎሎጬገን እሲሁ ሆጎችሰ ፎሎጬኖ።

11 ህካን እኮቤቹሃ ነኡ ብሬ ዘማን መኒሃ እዘዘሙ ግብ ሞሳልተ አዎኒን ኡምባምበእገ ህከን ፎሎጬን ኣንጎተ ጠረኝኖ።

12 መገን ላገት ፎሊን ሄኣኢተለከ ሆጉተ አታእታን፤ ለሞ አዲን ሙረኖ ብሲች አበ እጳሽታን፤ ነቢሳለከ እያን መላይመተለከ ሀምቡተ አደ አኦተ ኢለ ሙረንሰታእታን፤ ቀልብ ኣዜን ማጠሞ ሰውትለከ ሄዕላቸተ አደ አት ደጋእታን።

13 ከለቀሞርቹ ጉዕሙንኩ መገን ብሬች ማጠመኖበአ፤ እሰ ብሬን ጉዕሙርቹንኩ ግልጠለከ ከል እክ ለለኖሃን፤ ነኡን መሰለ ኣሰናሚሁ እሰ ብሬኒት።

ኢሰ ሎረ ቂስ ሀለቀ እሁስ

14 መገኑ ዮ ቤቹ ሰማሃ ኦሮዕዮ ሎሩ ቂሰቹ መገን ቤቱ ኢሰ ዮኔቤቹሃ አመዕነቱኔ ጠረኝንሰ አንፎ።

15 መሰንትሰ ኔሳሃ ዮ ሎሩ ቂሰቹ ሆንጋምረ መረርሲጨኖኔሃን፤ ጉዕመ ጠዋንን ኒገ ፊተነሞኢሃን፤ እኮጎሬ ጨብ አዕዮበእሃን።

16 መገኒች ማርቱተ ቶንጎተለከ ሀዕለንሹ ሀሰሰኖኔ ወክት ኣሰቱተ ኣእኖተ ማረኖ መገን ብርተ አመዕነቲን ሆንጠንኩ።

5

1 ጉዕሙንኩ ሎሩ ቂሰት መን በሊች መጠረንታኣ፤ ጨብ አቶ መን ወጥ መገኒሃ ክትምለከ ሰደቀ ሆንጠህሲሃ መገኒን መጠረንቶእረ።

2 ሁኩ ቂሰቹንኩ ሆጎሃ እኮቤቹሃ ገዋኑተለከ ሎሳእረ መረርሰጮተ አታለኖ።

3 እሰ ገውንኩሰ ሆጎሃ እኮቤቹሃ ኡመት ጨቢሃ ጠለዕል እሁዕናን ገይሰ ጨቢሃለከ መን ጨቢሃ ክትመ ሆንጠህሱ ሀሰሰኖሰ።

4 ሀሩንገ መገኒን ገአምባች ሎረ ቂስ እህ ኬዕምኝ አዪሁ ደኦተ አታለኖበአ።

5 ህትን መሲህ ሎረ ቂሶቹ እሆተ ገዉስ ሎሪሰኖበኣ፤ ጠዉ እኮጎሬ ህከ ሎርመተ ደኤኢሁ

«አት ኢሃ ቤቱ፤

እንን ከበር እሎንኬ» ዬ መገኒችት።

6 ህትን መገኑ ዋሎ ቤቸን

«አት መልከ-ዴዴቄገ ቂሶመ ሹምነትገ

ዘላለሚሃ ቂሶሃን» የኖ።

7 ኢሰን መንቹ እክ ዱንያ አሌን ሄዕዮ ዘማኔን ሬሆች ፌሶስተ አታለኖ መገን ቤቹ አበ ያረናንለከ እንጂጃን አበ ዱኦ አዕዮ፤ ኢሰን መገኑ ዋጀኖሃ እኮቤቹሃ ዱኡስ ሞጮጬሞ።

8 እሰን መገን ቤቱ እክ ኦርሽ ኣዝን ህጎጎሬሁ ህከ ቶጎ ኦርሻች አዘዘሙ ተማር።

9 እሰን ኩሌኖሰርቹ ኖበኢሃ እክ አዘዘንታሰሁኡተ ጉዕሚንከ ዘላለም ጡሚሃ መሰተ እኮሰ።

10 መገኑ ኢሰ መልከ-ዴዴቄ ቂሶማ ሹምነትገ ሎረ ቂሶቹ አዕዮሰ።

መኑ አመዕነቱሰ አጉርታበእገ ኣሰንቶ ሸዘነተ

11 ከን ጠውተኔሃ ልግሱ ጠወዕናም ጠዉ ዮኔ፤ ጠዉ እኮጎሬ ቴሱ ገበንቹን ተማሩ ሆጌንተቤቹሃ ሂሬን ክዕኔሃ ኩሉ ኦርሸተ።

12 ከ ወክት ኢላ አስተማረተ እኬንታ እቅ፤ እኮጎሬ መቱ መንቹ መገን ላገ ዋኔ ትምርቲሃ ክዕኔሃ ለንኪሃ ተማርሱ ሀሰሰኖ፤ ህትን እሰገን ጠረኝ እቸተ እሁዕነ እዙት ሀሰሳህዕኔ።

13 መሰንትሰ እዙተ አዋንሱ ጉዕሙንኩ ኦሶተ እኮቤቹሃ ጡመርቹ ሂለርቹች አደ አዕይ ደገኖበኣ።

14 ጠረኝት እቸት ሀሲሳኢሁ ጡመለከ ሂላ አደ አዕይ ደገኖ ሎርሎረ መኒሃት።

6

1 መሲህተኔሃ ዋዕና ኩለሞ ትምርተ አጉርን ጠረኝ ትምህርትበ ህንጎ፤ ሂላ ሆጌተ አጉርን ቶበንት መገኖን አመዕን ቀበበ ለንኪሃ እጃርኩንከ።

2 ህትን ጠመቀምተኔሃ፥ መን አሌን አንገተ አኤን ዱኦ አእተኔሃ፥ ሬዮ መን ኬአተኔሃለከ ጉዕመ ዘማንከ እሆኖ ፍርድተኔሃ ኩለሞ ትምህተ ለንኪሃ እጃርኩንከ።

3 ህዳን አጉርን መገኑ ዩጎሬ ብርተ ዋልን መርኖ።

4 አመዕነቱስ ካዶ መኑ ቶበት ሀት እክ ፈንቀልቶተ አታልታአ? ኩ መኑ ከኒች ብርተ ኑሩ ለልዮስ እቅ፤ ሰሜ ሽልማት ቀመሶ እቅ፤ ጠሊሊ አያኒን ሜጡብ ቤቀማኑተ እኮ እቅ።

5 መገን ጡመ ላገተለክ አሜተኖ አዲንያ አል ዋልቀተ ቀመሶ እቅ፤

6 ፈንቀልት ካዶ ጎሬ ጨብ አጉርታቤቹ እስተ ፈንቀሹ አታልሲስበሃን፤ መሰንትስ እስ ገውንኩስ ገይስ ቤሲሃ መገን ቤቱ ለንኪሃ ሰቀልቶእረላክ ሆፍሶአረ።

7 ልግብ ወክት መቼ መንቹ ኡለስ አሌን ኡር ጤነ አጋን አቡረኖሴ መንቹሃ ውጠተ አታ ኡለት መገኒች ማስተ ደእታ ኡለተ አጉዳአ።

8 እኮጎሬ ሀት ኡለት ኡተለክ ሽርፍቱት ነስቶጎሬ ሀሴንባተ እካእ፤ ደዕልት ቦርሪሃ እካእ፤ መጨረሹስ ግራን ቡባአ።

9 ኢተንቴንተ አመኤ ኦሶ! መሃ ክዕኔተኔሃ ሀትን ጠወዕኖምጎሬ ጡሚሃ ሀዕለኖሁ ቆሀኖ ጠው ዮሀዕኔገ ደንጋም።

10 መገን ሱዕምተኔሃ ይቲን ጠሊላኑተ ሀዕሎተ ዋዕነሃ እኮ ቲሁ አቲንተ ሆጉተለክ ለሊሴንተ ኢተተ ሀቦተ መገኑ ሾካበአ።

11 አዕኑ ጉዕሙንኩክዕኔ ተብሴን አገዕርቲነንተረ አፎኖተ ኢሊ ጠረኝመክዕኔ መጨረሻ ኢሊ ለሊሶኖተ ሄዕላንታም።

12 ነኡ ሄዕላንታሚንኩ አመዕነቲንለክ አታዕሊን ተብላሃ አሰሞስ ጠወ ረገአ መነ አጉደኖታት ቤሉ ዋንክዕላሙ መነ እኮኖታበአ።

መገን ተብሶሁ ሀንቂሃ እኮገ

13 መገኑ እብራሂሚሃ ተብላሃ አሴ ወክት ገዪችስ ሎሩ ጤሌዕለኖርቹ ዮስበእቤቹሃ እስ ገዋንከስ ጤሌዕለን

14 «ሀንቅንከ አን ማስኣንኬ፤ ዘርክን በትሳንኬ» ዬስ።

15 እብራሂምን አታዕል አበ ዘማን አገርቤቹሃ ተብላሃ አሰሞስርቹ ደኤእ።

16 መኑ ጤሌዕለን ገይችስ በተአኖርቹን ጤሌዕለኖ፤ ሀሳወስ ቦርርን ኡርስ በለስ ዮ ኦደተ ጉዕመንከ በሊችስ ከንታአ።

17 ሀትን መገኑ እስ አላመት እኩዕነ ፈቅባሃ እሁስ ለሊሶተ ሀሾቤቹሃ ተብሳስ ቶጋ መኒሃ ቦርርን ጠረኝሾ።

18 እስ ደረንትበለክ ክዘቤንበ ለሙ ጠወ አሰዮኔ፤ እስን ተብሳለክ ጤሌዕሉሃን፤ ከን ለሞ ጠዊ መሳን ብሬንከኔ ዮ ተብላሃ ጠረኝንስ አፋ አታልኖተ ሆቀንሽ ደእኖተ እስቤቹ ሁኖምሩ ነኡ አበ ጠረኝመተ ደእኖም።

19 ኩ ተብሶሁ ዌደሩ ኒ አሌን ኡሱሬን ዎሎ ዌደር ሰኑት መጋረጀ ህግ መገኑ ደገመኖ ኣዝ ጠሊሊ ቤቹ ኣገኖ።

20 ሁኩ መልከ-ዴዴቄ ቂሰ ሹምነትገ ዘላለሚሃ ሎረ ቂሰቹ እኮ ኢስ ኒተኔሃ ዎዕኔሃ እክ ኣጎእሃን።

7

ቂሰቹ መልከ-ዴዴቄ

1 ኩ «ሳሌመ» ዬኖ ባድ ዳፕለከ ጉዕሚቶን ሎረ ቂሰቹ እኮ መልከ-ዴዴቄ እብራሂም ዎመተ ቄል ፈንቀሎ ወክት እሲን ዎቃን ደቀም ማሰዕዮሰ።

2 እብራሂምን እሲሃ ኣግ አፎርቺቶ ጉዕሚቶን ቶኒቶ መቱሰ ኣሴሰ፤ መልከ ዴዴቄ ሱዕምሰ ፍሳረት ወዕናሃ «ፈየ ዎመ» ዩሃን፤ ህትን ዎሉስ «ሳሌም ዎመ» ህከረንገ «ወገሬት ዎመ» ዩሃን።

3 መልከ-ዴዴቄሃ ኣኑለከ አመት ዮሰበኣ፤ እሊንሽ ዘርት ዮሰበኣ፤ ዘማንህሰ ብርት ሄእህሰ ኤተሩ ዮሰበኣ፤ ጠዉ እኮገሬ መገን ቤት ምሳልተ እክ ዘላለሚሃ ቂሰቹ እክ ሄአኖ።

4 ወዕኔ ኣኑ እብራሂም ኣግ ኤቦሀኒቶ ቶኒቶ መቱሰ ኣሴሰ ኩ መንቹ ሄንከ ሎረ ጎር ለዕዬ!

5 ሌዌ ዘሬቶ ቂሰ እኮእሩ ኡመቲቶሰ እብራሂም ዘርተ እኮ አመሰ ኦሶቶ ቶኒቶ መቱ ኣእታገ ትዛዙ ሕጊን አዘዘሞሰ።

6 ሁኩ መልከ-ዴዴቄ ሌዎውያን ዘርተ እህበጎሬ እብራሂሚቶ ቶኒቶ መቱ ኣኤእ፤ ተብሴ ላገተ ኣሰሞሰ እብራሂመ ማሰዕዮሰ።

7 ህካን እኮቤቹሃ ማዕኑ ሀንገሬቶ ማሰተ ኣአኖገ ሸክት ዮሰበኣ።

8 መቶ አዲን ቶኒቶ መቱ ቶጋዕሩ ሬታእሃ መነ፤ ህትን ዎሎ አዲን ቶኒቶ መቱ ቶገኖሁ ህትን ሄአኖሃ እክ መሰከረሞሲሁ ጠሊሊ መጻፋን ከተበሞገን መልከ ዴዴቄት።

9 ቲሁ ቶኒቶ መቱ ጭምእአኖ ሌዌ ገውንኩስ እብራሂም አዲን ቶኒቶ መቱሰ ባቾ ዩሃን።

10 መሰንትሰ መልኩ-ዴዴቄ እብራሂምን ዎቄ አሌን ደቀም ወክት ሌዌ እብራሂሚቶ ከለቀሞበኣ እቅ።

11 ቲሁ ሕጉ እስረኤል ኡመቲሃ ኣሰሞሁ ሌዌ ቂሶመ አዲኒት፤ ህትን ቂሶማን ጉዕሙርቹንኩ ዊመ እክ ደገሞ እቃን ሀሩንገ እሁዕን መልከ-ዴዴቄገ ዮእ ዎሉ ቂሰቹ ሚ ሀሰሰኖ እቅ?

12 መሰንትሰ ቂሶመት ዶረንቶቶ ህትን ቂሶመ ሕጉ ዶረሙ ሀሰሰኖሰ።

13 ኩ ጠው እስተኔ ኩለሞ ቂሶቹ ዋሎ ደቦቹት፤ ህከን ደቦቹን አዪሁ መገኒሃ ክትሞ ሆንጠህሴኖ ጠረጴዝበ ሆንጠክ ካደሞሁ ዮብእ።

14 መሰንትሰ ቀርቼ እለሞሁ አይሁድ ደቦች እሁሰ ለልዮእሃ ጠወ፤ ሙሰን አይሁድ ዘሬ ቂሶተኔሃ መቼርቼሃ ኩሎበእ።

መሲህ መልኩ-ዴዴቄገ ዮ ቂሶቹ እሁሰ

15 መልኩ-ዴዴቄገ ዮ ዋሎ ቂሶቹ አሜሾ ወክት ኩ ጠው ኑር እክ ለለኖ።

16 እሰ ቂሶመ ሹምነቱ መን ዘሬኝሰ አሜሾ ሴሪን አሜቶአተ እኩዕናን ህግበ ሄእ ወልቃን አሜቶእታን።

17 መሰንትሰ «አት መልኩ-ዴዴቅ ቂሶመገ ጉዕመ ዘማኒንከ ቂሶቼሃን» የመሞ ጠሊለ መጻፋን መሰከረሞሰ።

18 ህካን እኮቤቼሃ ወዕኔ ዘማን ሕጉ ላፈለከ ደግለልባሃ እኮቤቼሃ ድጀሞኡ።

19 እኮጎሬ ነኡ መገን ቤቹ ሆንጠንካሞ ቆህኖ ተብሶሁ አሜሾኡ፤ መሰንትሰ ሙሰ ሕግ አዲን ህኩ መንቼሁ መገን ብሬን ነጠ እሆተ አታሎበእ።

20 ኩ ቂሶመት አሜቶአሁ መገን ወኣድ ቤሉ እኮበእ፤ እኮጎሬ ዋሎ ቂሶ እኮአሁ ወኣድ ቤሉሃት።

21 እኮጎሬ እሰ ቂሶመት ወኣዲን እኮእታን፤ መሰንትሰ «መገኑ <አት ዘላለሚሃ ቂሶቼሃን> ይ ወኣድ ኣጎቤቼሃ ሰጨኖበእ» የመሞ እስተኔ ጠወአሞኡ።

22 ህከን ወኣድ መሳን ኬዕዮህኒን ኢሰ ቆህኖ ወኣዲሃ ሩባታሰንቹ እኮኡ።

23 ዋኔ ዘማን ቂሶት ሆጉሰ አጉርቱዕናን አታበእገ ሬሁት ከንቶቤቼሃ እሰ ወሊንሹ ልግብያ እቅ።

24 እኮጎሬ ኢሰ ዘላለሚሃ ሄኣኖሃ እኮቤቼሃ ዶረንትብ ቂሶመት ዮሰ።

25 ኢሰ እስተኔሃ መገኑ ኡጮሰተ ጉዕመ ወክትንከ ሄኣኖሃ እኮቤቼሃ እሰ አዲን መገንበ ሆንጠካረ ዘላለሚሃ ጡምሶሰተ አታለኖ።

26 ኔሳሃ ህትናሙ ጠሊሉ፥ ኩሌኖሰርቹ ዮሰበኢሁ፥ ነጠ፥ ጨበኛኖች አደ እኮሃ፥ ሰሜች አሌ ዋል ጎት ዩኢሁ ሎሩ ቂሰ ሀለቁ ሀሰሰኖኔ።

27 እስን ዋሎ ሎረ ቂስገ ሄጭ ገይሰ ጨብተኔሃ ኤተሮን ኡመት ጨብተኔሃ በሬን በሬን ክትም ሆንጠህሱ ሀሰሰኖሰበኣ፤ ገውሰ ክትም አዕይ ሆንጠህሾ ወክት ለንኪሃ በርጌኖበኣገ ሜጥቸረን ሹል ቅጥ አዕዮኡ።

28 ሙሰ ሕጉ ላፈ መነ ሎረ ቂስ አዋንሳኑተ አዕይ ሾመኖሰ፤ እኮጎሬ ሕጊች ኤተሮን አሜቸሁ ወኣድ ላጋን እኮጎሬ ዘላለሚሃ ኩሌኖሰርቹ ዮበኢሃ መገን ቤቱ ሹመ አዕዮሰ።

8

ኢስ ሃዕር ወኣድ ላገ ሎረ ቂስ ሀለቀ እሁስ

1 ቱሁ ጠወዕኖም ጠዊች ቡዕሉስ ከኒት፤ ሁኩንን ጉዕሚች ሎረ እኮ መገን ዋመ ቦርጭመ መኬ አዲን ሰማን አፋዕሌ ህትናሙ ሎረ ቂስ ሀለቀ ዮኔ።

2 እስ ሀንቅ ዱካነ እኮ ዱእ ምኒ ኣዜን ቂስ ሀለቀ እክ ካደመኖሃን፤ ዱካኑስ መን አንጋን እሁሰነ ቀርች አንጋን ካሰሞእሃን።

3 ሎረ ቂስ ሀለቀት ጉዕሙንኩ ሾመንታኢሁ መገኒሃ ሰደቀለክ ክትመ ሆንጠህሲሃት፤ ህካን እኮቤቺሃ ከን ቂስቺሃ ክትሚ ሆንጠህሴኖ መቱርቹ ሄኡ ሀሰሰኖሰ።

4 እስ አዲንያ አሌን ሄዕዮእቃን ቂስቹ እህኖበኣ እቅ፤ ሁኩንን ሕግጊን መገኒሃ አኤኖርቹ ሆንጠህሳ ዋሉ ቂስት ሄኦቤቺሃት።

5 እስ አቶኢሁ ሰማን ዮኢሃ ምሳልተለክ ሀላሃ እኮሀን ኣዜኒት እቅ፤ ሁኩን እኮሁ ሙሰ ዱካነ መክሶተ ቅጥዬ ወክት መገኑ «ቆተ አሌን ለሌሄ ሃለን ጉዕመርቹንክ አገርት አእ» ይ አዘኮሰጋት።

6 ቱሱ እኮጎሬ ኢስ በል መንቹ እኮ ወኣድ ላገተ ኑባቾ ወኣድ ላጋች ሎረ እኮቤቺሃለክ ቆሀኖ ወኣድ ላጋን ጀመረሞሃ እኮቤቺሃ እሲሃ አሰንቶ ሆጉት ሎረታን።

7 ዋዕኔ ወኣዴን ሉጨንሹ ዮበኢቃን ለንክ ወኣድ ላገት ሀሲሳሰበኣ እቅ።

8 መሰንትሰ ቀርቹ መገኑ እሳን ሉጨንሹ ደግ

«ቱሱ እን እሰራኤልለክ አይሁድ ባድ መኒን

ሃዕር ወኣድ ላገተ ኣጋም ወክቱ አሜተኖ» ዮኖ ቀርቹ።

9 ኩ ወኣድ ላገተ እን ግብጽ ባዲች ፋሾስተ አንገሰ አፎም በር አበኖኖንከሰ ኣጎም ወኣድ ላጋ ደነበኣ፤ መሰንትሰ እስ ኢ ወኣድ ላገተ ጠረኝት ሄኡ ሆኅቤቺሃ አጉሮንሰ።

- 10 «ህከን ዘማኒች ኤተርን እስረኤል መኒሃ
ኣጋም ወኣድ ላገት ተኔት ይ ጠወዕዮ ቀርቹ፤
ኢ ሕገንከ ቀልቤንከሰ አኣም፤
ወዘናንከሰን ከተባም፤
እነሰ መገኑ እሃም፤
እሰን ኢ ኤመት እካእ።
- 11 እሳችን አዪሁ ዋሉ መነሃ
እመሰቤቱ «መገኑ ደግ» ይ ተማርሰኖሰበእ፤
መሰንትሰ ቀዊች ኬሽ ሎረ ኢለ ጉዕሙንኩ
ኤሳሃ ደጋኤ።
- 12 እን እሰ ሂልመተ አጉረንሰ፤
ጨብሰን ለንኪሃ ሰውያምበእ» የኖ ቀርቹ።
- 13 ቴሱ «ሃዕር ወኣድ ላገተ» የኖ ወክት ወዕኔ ወኣድ ላገተ ኑባቹ
አዕዮኡ ዩሃን፤ ህካን እኮቤቹሃ ኑባጾኢሁ በአኖ ወክቱ ኢልዮኡ
ዩሃን።

9

አዲንያ አሌን ዱኦ አኤኖ ምኒ ክድመተኔሃ

- 1 ዋዕኔ ወኣድ ላገ ሰገዳኖ ሴሩለከ መን አንጋን እጃረሞ መገኒሃ
ሰገዳኖ ምኑ ዮሰሃ እቅ።
- 2 ለሙ ክፍሉ ዮሰ ዱካኑ ቅጥይዮ እቅ፤ ወዕኔ አብል ክፍሉ ኩራዘ
አፋሼኖሁለከ ጠረጴዙ፤ ክትም ዱቡቲ ሄኦ ዋዕኔ ክፍሉ «ጠሊለተ»
የመንታ እቅ።
- 3 ለንክ መጋረጂች ኤተር አዲን ደገመኖሁ ኣዝ ክፍሉ «ጠሊልች
ጠሊለ» ዩኖቤቹ ሄዕዮ እቅ።
- 4 ህከን ክፍል ኣዜን ዋርቂን መክሴመ ህጣን አጨሴኖ
ጠረጴዙለከ ጉዕመንከሰ ቤቹ ዋርቀ ቡሬን መክሴመ ወኣድ ላገ
ሳጥኑ ሄዕዮ እቅ፤ ህከን ሳጥን ኣዜን «መና» ዩኖ እቸት ሄኦ ዋርቅ
መሶቡ፤ ለቶ ሀሩን በርትቹትለከ ቶኑ ትዛዙ ከተበሞ ክኑ ሄዕዮ እቅ።
- 5 ታቦት አሌን ዮ ጨቡ አጉረመኖ ቤቹ ቴለኖ መዳንከሰ ጌረዳ
ጎንት ዮሰ መገን ኬዕምኝ ለሊሳ ክልቀቱ ሄኦ እቅ፤ ጠዉ እኮጎሬ ከን
ጠውተኔሃ ጉዕሚንከ ቴሱ መቱርቹሃ ጠወዕኖተ አታልናምበእ።

9:2 ፋል. 26፥1-30፤ 25፥31-40። 9:3 ፋል. 26፥31-33። 9:4 ፋል. 30፥1-6፤
25፥10-16፤ 16፥33፤ ዘኹ. 17፥8-10፤ ፋል. 25፥16፤ ዘዱ. 10፥3-5። 9:5 ፋል.
25፥18-22።

6 ጉዕሙርቹንኩ ህት ቅጥ ዪች ኤተሮን ቂስት ሆጉሰ አቶተ ዱካን ዋኔ ክፍል ኣዝ ጉዕመ ወክት ኣጋ እቅ።

7 ጠዉ እኮጎሬ ዋዕኔ ኣዝ ክፍል ጠለዕል ሎሩ ቂስቹ ዘማኔን መቼ ወክት ኣገኖ፤ እሰን ገይሰለክ መኑ ደጉዕነ አቶ ጩብሃ ቄጉ አፋዕነ ህከ ቤቹ ኣገኖበኣ።

8 ዋዕኔ ዱካኑ ሄከን ቤቹን ኡር ሄኣንን ጠሊልቶ ጠሊላ ቤቹ መሰኖ ዋቆሁ ፈንተኡ ሆጉሰ ጠሊሉ ኣያኑ ኩለኖ።

9 ኩ ጠው ከን ዘማኒሃ ምሳልተ እሀኖ፤ ኩንን ለሊሰኖሁ ሰደቀተለክ ክትመ ሆንጠህሰኖሰ መንቶ ቀልብ መገን ብሬን ነጠ አኣሰተ አታለኖበኣ።

10 ጉዕሙንኩ ጠዉ መገኑ ጉዕመርቹንከ ሃዕሮ አኣተ ኢላ ጠለዕል ሆጎ አሌን ዱንክታ እትለክ አግ ህትን ዊን ኣዕሌን ነጠ እሄኖ ሴሪን እኮእሪን።

11 ጠው እኮጎሬ መሲህ ቴሱ እሀኖ ጡመ ጠዊሃ ሎረ ቂስቹ እክ አሜቾኡ፤ እሰ ኣጎ መገን ዱካኑ ሎረለክ ዊመ ዊሚን እክ መክዮእሃን፤ ሁኩ ዱካኑ መን አንጋን መክዮበኢሃለክ ከን ኣዱንያ አሌን ዮበእሃ።

12 ጠሊልቶ ጠሊላ ቤቹ ሜጦረን ገይሰ ቂጊን ኣጎ ቤሉ ፊላእለክ ዋርጀመ ቄጉ አፍ ኣጎበኣ፤ ህትን ዘማን ጉዕመንከ ሄኣ ዋዝኑተ ኣሴኔ።

13 ፊዕላእለክ ዋርጀመ ቄጉ፤ ህትን ክትሚሃ ቡሴመ ሱሉም ጠበሩ ንጀሶመን አሌን ብን አኤኖረ ማል ንጀሲቶ ነጠ አዕይ ጠሊላ አሰኖሳሃ እኮቶ።

14 ጉዕመ ዘማኒሃ ሄኣኖ ጠሊላ ኣያን አዲን ገውሰ ህንቄኖርቹ ዮበእ ክትም አዕይ መገኒሃ ሆንጠህሾ መሲህ ቄጉ ሄኣኖ መገኒሃ ካደሞተ ቀልብኔ ሄንከ ሬሁተ ኤበኖ ሂለ ሆጎቶ ነጠ አኣኖ?

15 መገኑ ገኤሰሩ እሰ ተብሴን ኣሴሰ ዘላለሚሃ ጎፍበ ኡለተ ረገኡተ መሲህ ሃዕሮ ወኣድ ላገ በል መንቹ እኮ፤ ሁኩንን መኑ ዋዕኔ ወኣድ ላጋ ኣዜን ጠገም ሄዕዮ ወክት አዕዮ ጩቢቶ ገይሰ ሬሆን ጡምሶታት።

16 ሬሆኖ መንቹ ወሰያተ ኩዕሌርቹ ሄዕዮ ጎሬ መንቹሰ ሬሁተ አጥራመቲን ደጉ ሀሰሰኖ።

17 መሰንትሰ ሬሆኖ መንቹ ኩዕሌርቹ ዊመኖሁ ሬዮቶ ኤተሮንት፤ ጠው እኮጎሬ ኩዕሌሰ መንቹ ሬህባቶ ጠውሰ ዊሞተ አታለኖበኣ።

18 ህካን እኮቤቹሃ ዋዕኔሰ ወኣድ ላጋ ቄጉ ዱንተኡዕነ ህትን ጠረኝዮበኣ እቅ።

19 ሙሰን ሕግ ትዛዝ ኤመቲሃ ኩሎች ኤተሮን ዋርጃምለከ ፌዕላእ ቄጉ ዊን ልቀለቅ ቢሸ ሆለ ኦርዛንለከ «ህሶጸ» ዬኖ ሀሚን ሕግ መጻፋንለከ ኤመት አሌን ኪፎ።

20 ህካን ኪፎንኩ «ኩን መገኑ አገርቶኖተ አዘዡህዕኔ ወአድ ላጋ ቄጉ ከኒት» ዬእ።

21 ህትን ሙሰ ዱካናንለከ ኣዜንከሰ ሄኦ ጉዕማንከ ደግለሸቀሚኖ ኦዳ አሌን ቄጉ ኪፎ።

22 ሀንቅንከ ሙሰ ሕግ ሃሊን ቀዋርች ቤሉ ጉዕሙርቹንኩ ቄጊን ነጠ እህኖ፤ ቄጉ ዱንተኡዕነ ጨቡ አጉረመኖበኦ።

መሲህ ሬሁት ጨብ ቤሳኢሃ እሁሰ

23 ቄሁ ኩ ሰማን ዮ ምሳልተ እኮ ኦዳት ጉዕሙንኩ ከን ክትሚን ነጠ እካእ፤ እኮጎሬ ሰማን ዮ ምሳልት ከኒች በተአኖ ክትሚን ነጠ እሁ ሀሰሰኖሰ።

24 መሲህ ሀንቅ ምሳልተ እኮ መን አንጋን እጃረሞ ጠሊልች ጠሊሊ ቤቹ ኣጎበኦ፤ ጠው እኮጎሬ ኒተኔሃ ይ መገን ብሬን ለሎተ እሰ ሰማሃ ኣጎ።

25 አይሁድ ሎረ ቂሰ ሀለቁንኩ ዘማን ዘማኔን ገይሲሃ እህበ ቄጉ አፍ ጠሊልች ጠሊሊ ቤቹ ኣገኖገን መሲህ ገዉሰ ልግብ ወክት ክትሚ አዕይ ሆንጠህሶተ ኣጎበኦ።

26 ህት እኮች ኣዱንያት ከለቀንቶች ኬሽ ልግብ ወክት ኦርሸተ ቶጉ ሀሰሰኖሰ እቅ፤ ቴሱ እኮጎሬ ዘማን መጨረሻን እሰ ገዉሰ ክትም አዕይ ሆንጠህሽ ጨብ ቤሶተ በረገምበ ሃሊን ለልዮኡ።

27 መኒሃ መቶረ ሬሁ ሀሰሰኖሰ፤ ህትን ሬሆች ኤተሮን ፍርዱ ዮኡ።

28 ህትን መሲህ ልግብ መን ጨብ ቤሶተ መቶረ ክትመሞኡ፤ ህትን ጨብ እጂሃ እሁዕነ እሱ አገርታእረ ጡምሶተ ለምቅ ወክት ለለኖ።

10

1 ቴሱ ሕጉ ከ ኤተሩ አሜተኖሁ ጡመ ጠዊሃ ሀላሃ ቤሉ ሀንቅ ደናሰበኦ እቅ፤ ህካን እኮቤቹሃ ጉዕመ ወክትንከ ዘማን ዘማኔን ክትመንታ ክትመተ አፍ መገን ቤቹ ሆንጠካ መነ ሆሮን ነጣኑተ አኑተ ሆሮ አታለኖበኦ።

2 አታሎሃ እኮ እቃን ሁኩ ክትም ሆንጠህሳ መኑ መቶረ ጨብቕሶ ነጠ እኮች ኤተሮን ነጠ እኮገ ቀልቡሰ ደገናቤቺሃ ክትምሰ ሆንጠህሱ አጉርታ እቅ።

3 ጠዉ እኮገሬ ሁኩ ክትመት ዘማን ዘማኔን ጨብ ቃግሳእራን።

4 መሰንትሰ ዋርጃመለከ ፊዕላእ ቄጉ ጨብ ቤሶተ አታለኖበኣ።

5 ህካን እኮቤቺሃ መሲህ ከ ኣዱንያ አል አሜቾ ወክት «ክትመለከ መገን ምኒሃ ሆንጠህሴኖርቹ ሀሶንትበኣ፤

ጠዉ እኮገሬ ጅሰመ ቅጥ አቶንቴኤ፤

6 ህትን ጉዕመንከሰ ቡሴኖ ክትምለከ

ጨብ ነጠ አእኖ ክትሜን

ሙንደኦንትበኣ።

7 ህከ ወክት መጻፋን፤

«ኢተኔሃ ከተበሞገን ሁኩዕኑን ኢ መገኖ!

እን ኪ ሙራድ ዊንሾተ ከቤቹ አሜቾም፥ ዩም» ዩእ።

8 ወዕናሃ «ክትመለከ ሰደቀተ፥ ቡሴኖ ክትመለከ ጨብተኔሃ ክትሜኖ ክትም ሀሶንትበኣ፤ እሶኒን ሙንደኦንትበኣ» ኩሩኡት ሕግገ ሆንጠካእረ ዩእ።

9 ህከኒች ኤተሮን «ኢ መገኖ! እን ኪ ሙራድክ ዊንሾተ አሜቾም» ዩእ፤ ህትን ዋኔሲሃ ክትመ ከም ቤቸንከሰ ለምቅ ክትም ጠረኝሾ።

10 ህካን እኮቤቺሃ መሲህ ኢሰ መገን ሰሙት እኢን ሜጦረ ሹል ማለሰ ክትም አዕይ ሆንጠህሲንከሰ ነኡ ጨብቺኔ ጠሊላኑት እንኮም።

11 ሁኩ ሎሩ ቂሰት ጉዕሙንኩ ህከ ጨብ ቤሶተ ሆሮን አታልተቡ ህከ ክትማከተ ልግብ ወክት ሆንጠህሰን በሬን በሬን ኡር ካደመኖ።

12 ጠዉ እኮገሬ መሲህ ዘላለሚሃ መቼ ክትመ ሆንጠህሾች ኤተሮን መገን መኬ አዲን አፋዕልዮኡ።

13 ከኒች ኤተሮን ዲነሰ ሎካቕሰ ዋሮን እኮተ ኢላ አገረኖት።

14 መሰንትሰ መገኒሃ አደ እኮሁ ሜጦረ ሆንጠህሾ ክትሚን ዘማኒሃ ጉዕሚሃ ሹል ነጣኑተ አዕዮሰቤቺሃት።

15 ሄጭ ጠሊሉ አያኑ ከን ጠዋን መሰከረኖኔ፤

16 «ህከን ዘመኒች ኤተሮን

እሳን ኣጋም ወኣድ ላገት ተኒት የኖ ቀርቹ፤

ቀልቤንከሰ ኢ ሕገ አፋሻም፤

ቡዕልሰ ኣዜን ከተቦም» ዩእ፤

17 ህትን «ጨብሰለከ ሂላ ሆጉሰ

ሆሮ ሰውያምበአ» የኖ።

18 ህካን እኮቤቹሃ ጨቡ ጉዕሙንኩ አጉረሞች ኤተሮን ጨብተኔሃ ሆንጠህሴኖ ክትሙ ሆሮን ሄእኖበአ።

መገን አደ ሆንጠህ ሀሰሰኖሃ እሁስ

19 አመኤ ኦሶ! ኢስ ቁግ መሳን ጠሊልች ጠሊላ ቤቹ አንጎተ አታልሲሰኖኔ መለልመተ ደእኖም።

20 አንጋሚንኩ መጋረጅ አዲን ሁኩንን ገይሰ ጅሰም አዲን ፈቼኔ ሃዕሮ ዘመኒሃ ጉዕሚንከ ሄእኖ ዎቂኒት።

21 መገን ምኔን ሹምነቱ ዮሰ ሎሩ ቁሰቹ ዮኔ።

22 ህካን እኮቤቹሃ ሂላ ጠዊች ነጠ እንኮተ ቀልብኔ መሲህ ኢስ ቁገን ነጠ አዕን ጅሰመኔ ነጠ ዊን አዕልን ሀንቅ አመዕነቲንለክ ነጠ ቀልቢን መገን ቤቹ ሆንጠንኮ።

23 ከ ወኔድ ላገተ አሴኔሁ አመዕነሞኢሃ እኮቤቹሃ ከን አመዕንን መስከርናም ተብሳሃ ለሞንሱዕነ ጠረኝንሰ እንፎ።

24 ኢታንለክ ጡመ ሆኅን መት-መቱኔ ጠረኝጨቀሞ ቤሉ ሀበቀሙንከ።

25 ጉዕመ ወክትንከ ደቀመን መት-መቱኔ ጠረኝንሰ ቤሉ መት-መቱ መኑ ጭምዩ ሮሶገን ጭምዩ አጉርኑንከ፤ ዎዕኔች ባሰንከሰ ቀርች አሜት በሩ ሆንጠኮገ ሰውይቲኅን ከ ጠወ አዕዬ።

26 ነኡ ሀንቅ ደእኖሚች ኤተሮን ኢትን ጨብ አዕኖምጎሬ ጨብሃኔ እሀኖ ዎሉ ክትሙ ሄእኖበአ።

27 ጠዉ እኮጎሬ ከ ኤተሩ አገረመኖሁ ዋጅሲሰኖ ፍርድ በሩለከ መገኑ ግባ መነ እታ ጠረኝት ገረት ዮኡ።

28 ሙሲ ሕገ ህንቆ መንቹ ለሙ ህከረንገ ሰሱ ምሰክሩ አሌሰ መስከሮች መረርሲጩ ዮበኢሃ ሬሀኖ።

29 ህከረ መገን ቤቱ ህንቆሁ፥ ገዉንከሰ ጠሊላ አዕዮሰ ወኔድ ላገ ቁጉ ንጅሰሾሁለከ መገን አሰቶ አያነ ቦሮሮሁ ሄንከ ጠረኝገ ቀጠአመኖሃ አትደኖሀዕኔ?

30 መሰንትሰ «ገዴተ ፋላሚሁለከ ሀሰሰኖ ኤዳሃ ባታሚሁ አኔት» ሀትን «መገኑንኩ ኡመትሰ አሌን ፈረደኖ» ዬኢሁ አዬት ጎር ደንጋም።

31 ህካን እኮቤቹሃ ሄእኖ መገን አንጋን ኡቡ አበ ዋጅሲሰኖሃን።

32 መሲህ ኑር ቶጌንታች ኤተሮን ልግብ ኑርሸተ አእቱን ጠረኝ አጸንሺን እጅቴንተ ዎኔ ዘማን ሰውይዬ።

10:17 ኤ.ር. 31፥34። **10:22** ሊዌ 8፥30፤ ሕዘ. 36፥25። **10:27** ኢሳ. 26፥11።

10:28 ዘዱ. 17፥6፤ 19፥15። **10:29** ፋል. 24፥8። **10:30** ዘዱ. 32፥35-36።

33 መት-መቱ ወክት መን ብሬን ቦሮሬማህዕኔ እቅ፤ ጀልጀልይቲንታኦ እቅ፤ መት-መቱ ወክት ህትናሙ ኦርሸት ኢሌሰህኩን ሜጡበ አዕኑሁ መዲነከሰ እኬን ኦሪሸተ ቶጌንታኦ።

34 አዕኑ ኡሱረሞ መኒሃ አሙዜነንታ፤ ቆህኖለከ ጎፊበ ዱንያት ሰማን ዮህዕኔገ ደጌነንተቤቺሃ ዱንያክዕኔን ዘረፈንቶ ጎሬ ፈረኬን ጠወሰ ሙንዲኖን ቶጌንታኦ።

35 ቲሱ ሎረ ሸልማት ደእቲነንተገ አእኖ አመዕነሙክዕኔ ኡጅቶኖቹ።

36 መገኑ አተኖርቼ አቲን ሹልቲንታች ኤተሮን መገኑ ኣሶህዕኔተ ወኣድ ኣጎርቹ ደእቶኖተ ፈረኬን አገሩ ሀስሰኖህዕኔ።

37 መሰንትሰ

«ሁኩ አሜተኖሁ ቀዎ ወክቲች ኤተሮን አሜተኖ፤ ዱንከኖበእ፤

38 ኢህ እኮ ፈዩ መንቹ አመዕነትን ሄኡ ደአኖ፤

ጠዉ እኮጎሬ ኤተሩ ዋል ፈንቀሎ ጎሬ

እን እሲን ሙንደአምበእ» የመም ከተበሞኡ።

39 ነኡ እኮጎሬ አመዕነቲን ጡምታህኡኒት ቤሉ ኤተሩ ዋልት በኣህዕኑኒበእ።

11

አመዕነትነህ

1 አመዕነቱ ዩ ተብሴን አገዕርናምረ ደእናምገለከ ለዕንበርቹ ሄኡሰ አጥራመች ኩለኖኔሃን።

2 ዋዕኔ ዘማን መኑ መስከረሞሳሁ አመዕነትሰ መሳኒት።

3 ከለቀሞርቹ ጉዕሙንኩሰ መገን ላጋን ከለቀሞገለከ ለዕናምርቹ ጉዕሙንኩ ለዕንበርቹች እሁሰ አመዕነቲን ደንጋም።

4 አቤል ቃኤሌ ክትሚች በተአኖ መገኑ ሙንዲሲሰኖ ክትም አመዕነቲን ሆንጠህሾ፤ እሰ ሆንጠህሾ ክትም መገኑ ኢት ቶጎ ወክት ኣቤል አመዕነትሰ መሳን ፈዩ እኮገ መገኑ መስከሮስ፤ ኣቤል ሬዮ ጎሬ አመዕነቲንከሰ አዕዮ ሆጎን ከበሬ ኢላ ጠወአመኖት።

5 ሄኖክ ሬሁተ ለኡዕነ ሰማሃ ኦሮዕዮሁ አመዕነቲኒት፤ እሰን መገኑ መሴሰቤቺሃ ደገሞበእ፤ ሄኖክን መገኑ መሴዕናንሰ ሄጭ መገኑ ሙንደእሲሾጉ መስከረሞሰ።

6 ህትን አመዕነቱ የበኢሃ መገኑ ሙንዲሲሱ አታለመኖበኢ፤ መሰንትሰ መገን ቤቹ ሆንጠሀኖሁ ጉዕሙንኩ መገን ሄኡሰለከ እሱ ሀሳሁኑት ሸልማት ኣሰኖ እሁሰ አመዕነ ሀሰሰኖሰ።

7 ኑህ እሌን ለእባንከ እሀኖሃ እሁሰ መገኑ ኩላንሰ መገኑ ዋጅ ምንሰ አበሮሱ ጡምሶተ መርከበ መክሾሁ አመዕነቲኒት፤ ኑህ አመዕነት መሳን ኣዲንያ አሉ ጩበኝ እክ ደገሞቤቹሃ ፈረደሞሰ፤ ኑህ አመዕነቲን ደኤኖ ፈይመተ ደእቶ መን በሊቶ መቼሰ እኮ።

8 እብራሂም እርሰተ አዕይ አፈኖበ መርተ ገአሞ ወክት መረኖሰቤቹ ሀከንቤቹኅር ደጉዕኖን ትዛዝ ቶግ መርሁ አመዕነቲንት።

9 እሰገን ተብሴ ላገተ ረገኣኑተ እኮሀኑኡቶ ይሳቂንለከ ያቁቢን ተቢሴን ኣሰሞ ባዶን ሆቀንሸ ኣግ ዲካኖን ሄዕኖሁ አመዕነቲንት።

10 መሰንትሰ እብራሂም መገኑ አቀጃሁለከ ጠረኝሽ እጃር ጠረኛ ቀበቡ ዮ ዘላለም ከተመ አገዕረኖሴቤቹሃት እቅ።

11 ህትን ሳራሃ ተቢሳ ኣሴ መገኑ አመዕነሞሃ እኮገ ደኅቤቹሃ ሄንከሃ ኑባቹተ እሆንከሴ እሉ አታልትባተ እኮኅሬ ላፈተ እኮተ አታልታ ወልቀተ ደእቶኢሁ አመዕነቲኒት።

12 ህካን እኮቤቹሃ ሬዮ መንገ ዋለአመኖ መቲቶ እብራሂሚቶ ሰሜ ቤዘገ በተዕዮለከ ባር ሸፋርገ ዋለኤንቡ ዘርት ደገንቶኡ።

13 ሁኩ መኑ ጉዕሙንኩ ሬቶተ ኢለ አመዕነቱሰ አገርት ሄኡኡ፤ እሰን ኣሰሞሰ ተብሳሃ ደእቶበኢ፤ ጠው እኮኅሬ ህካንን ቁዕራቫን ለእ ሙንዲኖን ኣእቶኡ፤ እሰን ኣዲንያ አሌን ኮሃለከ ዋሎ ባዲቶ አሜቶረ እሁሰ ጠወኡኡ።

14 ህት ጠወኣ መኑ ሀንቅ እኮ ገይሰ እሀኖ ባዲ አገርታገ ግልጠ አት ለሊሳኦ።

15 ህከ አጉርት ፋልቶ ባዲ ቃኅእቃኔተ ህከ ቤቹ ፈንቀልቶተ አታልታ እቅ።

16 ቱሱ እኮኅሬ በተአኖሲሃ ሰማን ዮ ባዲ ሱንታኦ፤ ህካን እኮቤቹሃ መገኑ ከተመ ቅጥ አዕዮሰቤቹሃ «መገኑኔ» ይት ገእቶኅሬ ሙልሰኖሰበኢ።

17 እብራሂም ፌተነሞ ወክት አመዕነቲን ኢሳቀ ክትሚሃ ሆንጠሀሾ፤ ተቢሴ ላገተ ኣኤ እብራሂምን ሚጥቹሰ ቤቱ ክትሞተ ተቃጠቦ እቅ።

18 ሁኩንን መገኑ «ዘርክ ኢሳቂን ገእንታኦ» ይዮሰ እቅ።

19 እብራሂምን መገኑ ሪሆኝ ኬሶተ አታለኖገ ደጎቤቼሃ ሪሆኝ ኬዕዮህንገ ዋለዕይ ቤቱስ ኢሳቀ ደኤእ።

20 ኢሳቅን ብርተ ዋሽ አሜተኖ ጠወ ሰውይ ያቁበለክ ኤሳ ማሰዕዮሳሁ አመዕነቲንት።

21 ያቁብ ሪሆኖ ወክቱ ኢሌ ወክት ዩሱፍ እለተ መት-መቱስ ማሰዕዮሁለክ ሸካንከስ ሸከዕይ መገኒሃ ሰገጃሁ አመዕነቲንት።

22 ዩሱፍን ኤተሮን ሪሆተ ሆንጠኮ ወክት እስራኤል ኦሱት ግብጽ ባዲኝ ፋልታገ ጠወዕዮሁለክ ምቀስ አጉርት መርታበእገ አዘዦሳሁ አመዕነቲንት።

23 ሙስ እለሞ ወክት አበ ተሽ የኖ ጨል እሁስ ሙስ አመሰለክ እኩስ ለኤቤቼሃ ዋም ትዛዝ ዋጅቱዕናን አመዕነቲን ሰሱ እገንገበጭ አቶስ።

24 ሙስን ነጼ ወክት «ፍራኦኔ ቤቶ ቤቱ» ዬን ገኤኖሰበእገ አመዕነቲን ግሶ።

25 መስንትስ ጨቢን ቀዋ ወክቲሃ ደኤኖ ሙንዲኖኝ አበ መገን ኡመቲን ሜጡብ እክ ኦርሽተ ቶጉ መጠርቤቼሃት።

26 ሙስ ብርተ ዋሽ አገረኖስ ሽልማት ደአኖገ መገኑ ቱክ ይ ለዕይ አመዕኔቤቼሃ ግብጽ ባድ ቀባጦኝ በትሽ መሲህተኔሃ ህንቀሙ አበ እሁስ ሰውዬእ።

27 እስን ዋም ኡሙዕርተ ዋጂዕነ ግብጽ ባዲኝ አመዕነቲን ፋሎ፤ እሌን ለኤንበ መገኑ ለዕዮህንገ አዕይ አላማንተስ ጠረኝ ኡሬእ።

28 ሀንገፈ እለተ ቤሰኖ መላይኬቹ እስራኤል ሀንገፈ እለተ ኡለኖበእገ ሻሽግለክ ጡፋን ቄጉ ክፍ ሴረ አመዕነቲን አዕዮ።

29 እስራኤል መኑ ሞልቶ ኡላን ቶልታህንገ እክ አመዕነቲን ኤርትር ባረ ቶልቶኡ፤ እኮጎሬ ግብጽ ባድ መኑ «እሰገን ቶልናም» ይት ኬኦ ወክት ባር ዋን ኣእንቶኡ።

30 ህትን ኢያሪኮ ከተም ግንቡ እስራኤል ኦሱት ለመለ በር አመዕነቲን ዘህቶኝ ኤተሮን ድጀም ኡሶ።

31 ዝነተ አተ ረኣብ ኡለተ ዳንድታ መነ ወገሬቲን ቶጎቤቼሃ ህከ መገኒሃ አዘዘንቶበእ መኒን ሜጡብ በኡዕነ ሪሆኝ ጡምቶኢሁ አመዕነቲንት።

11:20 ክል. 27፥27-29፤ 39-40። 11:21 ክል. 47፥31—48፥20። 11:22 ክል. 50፥24-25፤ ፋል. 13፥19። 11:23 ፋል. 2፥2፤ 1፥22። 11:24 ፋል. 2፥10-12። 11:27 ፋል. 2፥15። 11:28 ፋል. 12፥21-30። 11:29 ፋል. 14፥21-31። 11:30 ኢያ. 6፥12-21። 11:31 ኢያ. 2፥1-21፤ 6፥22-25።

32 ቲሱ ዋሉ መ ያም? መሰንትሰ ጌድዎኔተኔሃ፡ ባረቁተኔሃ፡ ሶምሶኔተኔሃ፡ ዩፍታሃተኔሃ፡ ደዉደተኔሃ፡ ሳሙኤሌተኔሃለከ ነቢያከተኔሃ ኩላምበኢሁ ወክቱ ሄዕበኤቤቺሃት።

33 እሰን አመዕነቲን ዋመተ ቄልቶኤ፤ ጡመ ሆጉተ አቶኤ፤ መገኑ አሴሰ ተብሴ ላገተ ደእቶኤ፤ ዘቤ አፎንከ ጡፎኤ።

34 ህትን ገረ ዋልቀተ ቤሶኤ፤ ገመጠሞ ሲፍችን ፋሽአቶኤ፤ ላፍማች ጠረኝማን ህጎኤ፤ በገዛንን ጠረኝቶኤ፤ አብል ዲን በገዛንከ ሸርቶኤ።

35 ሜንቱንኩ ሬቶ እሉሰ ሬሆች ኬኣን ደእቶኤ፤ ዋሉሰንገ ቆሀኖ ኬኤ ደእቶተ ሰውይት ሬቶተ ኢለ ኦለንቶኤ፤ ኡሱሮችን ሂረሙ ግቦኤ።

36 ህትን ዋሉሰንገ ህንቄን ኦሌመሰ፤ ህከኒችን አበ ሰንሰለቲን ኡሱሬን ኡሱር ሞኒ አግሴመሰ።

37 ህትን ክኒን ቀሴናንሰ ሬቶኤ፤ መጋዚን ለሙ ቤቹ ፊሌመሰ፤ ሲፍን ሼመ፤ ጉዕመርቹንከ ሆግ ሸረንተንለከ ጨነቀንተን ሆለ ጎገለከ ፊዕላእ ጎገ ኦደእ ዘህቶኤ፤ ቡጥቻትለከ ሸሬመሰ መነ እክ ኦርጨቀንተን ሄኦኤ።

38 እሳንከ ኩ አዴንያ አሉ ገበእበሰቤቺሃ ኡለ ኡድማን፡ ቆታን፡ ሻንቃንለከ ክን ረባን ዘህተን ሄኦኤ።

39 ኩ ጉዕሙንኩ መኑ አመዕነትሰተኔሃ መሰከረሞሰጎሬ ኣሰሞሰ ተቢሳሃ ደእቶበኤ።

40 መገኑ ኔሳሃ ጉዕመ ቆሀኖርቹ ቅጥአዕዮቤቺሃ ሁኩ መኑ ነኡ ሄዕንባሃ ዊመ እኮተ አታልቶበኤ።

12

መገኑ እነኔ እሁሰ

1 ህካን እኮቤቺሃ ጎመገ አደንከኔ ረብ ዮ ሁኩ ጉዕሙንኩ ሞሰክሩ ዮኔቤቺሃ እጅገከ ኬዕመኖርቹ ጉዕመንከለከ ኡሱር አፎኔ ጨብ አሊችኔ ከሞ ብሬንከኔ ዮ ሄጫቀንሸ ጠረኝን ደጉንዶ።

2 ደጉንዳሚንኩ አመዕነቲሃኔ ቡዕላለከ ዊንሸኖሃ እኮ ኢሰ ለዕኒት፤ እሰን ብሬንከሰ ዮ ሙንዲኖተኔሃ ይ መሰቀል አሌን ሬሆኖ

11:32 መሳ. 6፡11—8፡32፤ 4፡6—5፡31፤ 13፡2—16፡31፤ 11፡1—12፡7፤ 1 ሳሙ. 16፡1፤ 1 ነገ. 2፡11፤ 1 ሳሙ. 1፡1—25፡1። 11:33 ዳን. 6፡1-27። 11:34 ዳን. 3፡1-30። 11:35 1 ነገ. 17፡17-24፤ 2 ነገ. 4፡25-37። 11:36 1 ነገ. 22፡26-27፤ 2 ዱዱ. 18፡25-26፤ ኤር. 20፡2፤ 37፡15፤ 38፡6። 11:37 2 ዱዱ. 24፡21።

ሬሆ ሆፍኝ መቼርቼሃ ዋለኡዕነ አታዕል መገን ዳኝነት ቦርጭማን መኬ አዲን አፋዕልዮኡ።

3 ህትን አዕኑ ህፈቶኑዕናንለከ ተቢሳሃ ሙርቶኑዕናን ጨበኛኖ ኦደተ አታሎ ኢሰ ሰፊይዬ።

4 አዕኑ ጨቢን አጸንቲንን ቄጉክዕኔ ዱንተኦተ ኢሊ ግቤንታበኦ።

5 መገኑ ክዕኔተ ገይሰ እለገ

«ኢ ቤቶ! ቀርኝ ሸዘነተ ህንቆት፤

ቀጠአኖሄ ወክትንከ ተቢሳሃ ሙርቶት።

6 መሰንትሰ ቀርቼ ኢተኖሲሃ ሻቀኖሰ፤

ቤትሰገ አዕይ ለአኖሃ ጉዕመንከ ቀጠአኖ» ዬ ሸዘነተ ህቤንንዶ?

7 እኑ ሻቅ ሸዘበሰ ቤቱ አዬት? መገኑ ክዕኔተ እለሰገ አዕይ ለአኖህዕኔቤቼሃ ሻቅ ሸዘሆህዕኔጎሬ አታዕልዬ።

8 ህትን እለሰ እኮእሩ ጉዕመንኩ ቀጠአንተ ቅጣቲሃ አዕኑ ቀጠአንቶኑዕናን ፈቄንተጎሬ ህንጨረባሃ ቤሉ አለተሰበኦ።

9 ማለን አልቶህዕኔ አናኑት ቀጠኦህዕኔ እቅ፤ እኮጎሬ ነኡ እሰተ ኬዕምንሳንሰ እቅ፤ ህካን እኮኝ ሄኢሃ ጉዕሚንከ እነ እኮ መገኒሃ ሄንከ በትንሰ ጠገሙለከ ሄኡ ሀሰሰኛ፤?

10 አናከክዕኔ ቀዋ ወክቲሃ ጡመ አጉጅ ለሌሰገ ቀጠኦኔ እቅ፤ እኮጎሬ እሰ ጠሊለ እኮገን ጠሊላኑተ እንኮተ ኒ መኮተ ይ ቀጠአኖ።

11 ቅጣቱ ጉዕመንኩ ወክቲሃሰ ሻዝሰኖ ቤሉ ሙንዲሲሰበሃን፤ ኤተሮንገ ሮሶ መኒሃ ወገሬትለከ ፈይመ ላልቼ ላልታገ አአኖ።

ሸዘነተኔሃ

12 ህካን እኮቤቼሃ ናፎ አንገክዕኔለከ ሆኅ ጉበክዕኔ ጠረኝሼ።

13 አዕኑ ድኑ እኮ ሎከክዕኔ ፈይቶታት ቤሉ ባሰንከ ቡቱከንታበኦገ ሎካተክዕኔ ጡመ ዎቃሃ መክሼ።

14 መኒን ጉዕሚንን ወገሬቲን ሄኢሃለከ ጠሊልማን ሄኢሃ ጠረኝዬ፤ መሰንትሰ ጠሊልመት ዮበኢሃ አዪሁ ቀርቼ ለኦተ አታለኖበኦ።

15 ክዕኔኤች አዬሃ መገን ኣሰቱት ሆፈኣሰበኦገለከ ልግብ መነ ንጃሲሰኖ ቀራረኖ ጠጹ በላንከክዕኔ ሙኝ ኦርሰኖህዕኔበኦገ አገዕርዬ።

16 ህትን ሀንገፎመስ መቶ ወክት እቻተ ይ ህሮ ኤስገ መገኑ ዋጅበለክ ዝነተ አእኖ መንቹ ደገመኖበእገ አገዕርዬ።

17 ኤስ እንስ ማስተ ደኦተ ኤተሮን መሃ ኦዕይ ደኦተ አታሉ ሆጎገ ደገነንተ። * ቶበቶተ ዕድል ደእዮበአ።

18 አዕኑ አንጋን አፊሃ አታሌኖ ሲና ቆተበ ኢልቴንታበአ፤ ህት ቆተት ቡባኢት እቅ፤ ህከንቤቸንን ጭልመ ቱንሰቹለክ ኡንጉሉሎ ቡብሩሁ፤

19 ጡሩምቡለ ሞጮጪሃ ዋጅሲሳ ላገቲ ሄኦ እቅ፤ ህተ ላገተ ሞጮጭቶ እስራኤል መኑ ዋልት ላገት በርገንት ኩላንታሰበእገ ኡጭቶኡ።

20 መስንትሰ «ዋሉ ፈቅ ግዙ ህከ ቆተተ ኡሎጎር

ክኒን ቀሴናን ሬሁን»

የኖ ትዛዝ እጅቶት ኬዕሜሰቤቺሃ አታልቶበአ።

21 ለሌኢሁ አበ ዋጅሲሰኖሃ እኮቤቺሃ ሙስ

«አን አበ ዋጄም፤ ሁጮሚሁ» ይእ።

22 አዕኑ እኮጎሬ ጽኑን ቆተተ፤ ሄእ መገን ከተመ ሰማን ዮ ዩሩሳሌመለክ ሙንዲኖን ጭምይቶ ዋሊንሹ ዮበኢ መገን መላይከበ ሆንጠኬንታአ።

23 ሱዕመሰ ሰማን ከተበንቶ መገን ሀንገፈ ኦሱተ እኮ አመዕናኖ ጭምትበለክ ዊመ ዊሚን ፈየ እኮ መን ነብሴበ ሆንጠኬንታአ፤

24 ሃዕሮ ወኣድ በል መንቹ እኮ ኢሲበ፤ ኣቤሌ ቂጊች ቆህሽ ጠወአኖለክ ጨቢች ነጠ አኦኔተ ኪፈሞ ቂግቤቹ ሆንጠኬንታአ።

25 ከ ጠወ ኩለኖሃ ግቤነንተበእገ አገዕርዬ፤ መስንትሰ መገኑ ሙስ አዲን ኣዲንያ አሌን ኩለንስ ሞጮጭናምበአ ይቶሩ ሁንት ፉሽእትባች ህከረ ሰማን እክ ጠወአኖሀኒች ገበጭ ይናም ነኡ ህት እንክ ፉሽእኖተ አታልናም?

26 ህከ ወክት ላገስ ኡለተ ሌንቄቅሶኡ፤ እኮጎሬ ቲሱ እስ «ህትን መቶረ ጠለዕል ኡለተ እሁዕነ ሰማሃ ሌንቄቅሳም» ይ ላገተ ኣጎኡ።

27 ጠው እኮጎሬ ኩ «መቱ ወክት በርግ» ይታ ላገት ሌንቄቅትበ ጠውንኩ ጠረኝ ሄአኖገለክ ሌንቄቀኖ ህከረንገ ከለቀሞ ጠወ በአኖ።

12:16 ክል. 25፡29-34። * 12:17 ደኦተ አታሉ ሆጎገ ደገነንተ፡- ቶበቶተ ወክት ደእዮበአ የሃን 12:17 ክል. 27፡30-40። 12:19 ፋል. 19፡16-22፤ 20፡18-21፤ ዘዱ. 4፡11-12፤ 5፡22-27። 12:20 ፋል. 19፡12-13። 12:21 ዘዱ. 9፡19።

12:24 ክል. 4፡10። 12:25 ፋል. 20፡22። 12:26 ሐጌ 2፡6።

28 ህካን እኮቤቺሃ ነኡ ሌንቄቀኖበእ ዋምነቱ ረገዕናምቤቺሃ መገኑ ገለትጭኖ፤ እስ መንደዕዮገን ዋጅነንለክ ከበጅነን መገኒሃ ሰገንዶ።

29 መሰንትሰ ኒ መገኑ ቡሰታ ገረጋት።

13

መገኑ መንደሲሳ ክድመተ

1 አመኦሶ ኢተት ጉዕመ ወክትንከ በላንከክዕኔ ሄኡን።

2 ኮህ ቶጌን ካደሙ ሀቦኖቹ፤ ካን አኦንከሰ መት-መቱ መኑ ደጉዕነ መገን መላይከተ ኮህነቱ ቶሳኡ።

3 ኡሱረንቶሀኡገን እሳንን ሜጡብ ኡሱረንቴንተሀንገን ዋለኤን ሰውይዬስ፤ አዕኑሁ እሰገን ማሊንከሰ ኦርሸተ ቶጌነነተ ጌስ እኬን ኦርሸተ ቶጋእረ ሰውይዬ።

4 ቤቱተ ኤቡ ጉዕመንከ መንቤቾን ኬዕምኙ ዮሲሃ እሁን፤ ምኒ እኑ ምንሰ አማተ ህትን ምንሰ አመንት ምንሴ አኒሃ እመዕነቀንቶረ እኩን፤ መሰንትሰ ገይሰ ምኒ አኒቶ ህከረንገ ምንሰ አመ ቤሉ ዋሎ መኒን ዝነተ አታሀኡ አሌን መገኑ ፈረደኖ።

5 ብረ ኢቲቶ ገወክዕኔ አገዕርዬ፤ ዮህዕኔሁ እሁንክዕኔ፤ መሰንትሰ መገኑ ገወንኩሰ «እን ሆሮ ኡጃንኬበእ፤ አጉራንኬበእ» ይዮኡ።

6 ህካን እኮቤቺሃ ነኡ መለልን

«ቀርቼ ሀዕለኖኤ፤

እን ዋጃምበእ፤ መኑ መ አአኖኤ?» ይናም።

7 መገን ላገተ ኩልቶህዕኔ አዋንሳኑክዕኔ ሰውይዬስ፤ እስ ሀት እክ ሄኦገለክ ሬቶገ ለኤነን እስ አመዕነትገ ዮ አመዕነቱ አዋኜ።

8 መሲህ ኢስ ቤሬተለክ ከበር ዘላለሚሃ ሄአኖሃን፤ ሆሮ ዶረመኖበእ።

9 አደደ እኮ ሂለ ትምርቲን አገንቶኖቹ፤ ቀልቡክዕኔ መገን ኣሰቶን ጠረኙን ቤሉ ደግለለኖበእ እቶ ሴረ አገራን እሁንከ፤ እቶ ሴረ አዋንቶ መኑ መቱርቹሃ ደእቶበእ።

10 ኔሳሃ መገኒሃ ክትም ሆንጠህሴኖ ጠረጴዙ ዮኔ፤ እኮጎሬ መገኑ ደገመኖ ዱካን ኣዜን ሆጉተ አታ ቂሳከት መገኒሃ ክትም ሆንጠህሴኖ ጠረጴዚቶ አእት አቱ ፈቀዴኖሰበእ እቅ።

11 መሰንትሰ ሎሩ አይሁድ ቂስ ሀለቁ ጨብተኔሃ ክትመሞ ግዝ ቂጉ ጠሊልቶ ጠሊላ ቤቹ ሆንጠህሴኖ፤ እኮጎሬ ግዝሰ ማለ ቀኤቶ ገበለ ፋሼን ቡሴኖ እቅ።

12 ህትን ኢስ ገይሰ ቄጊን ኡመት ጠሊላኑተ አኦተ ከተሚች ኡሮ ገበላን ኦርሸተ ቶግ ሬዮ።

13 ህካን እኮቤቺሃ ነኡ ከተሚች ገበለ ፋልን እስን ሜጡብ ህንቀሞ።

14 መስንትሰ ኔሳሃ ከን ኣዲንያ አሌን ዘላለሚሃ ሄአኖ ከተሙ ዮኔባእ፤ ጠዉ እኮጎሬ ከ ኤተሩ አሚተኖ ከተመ አገዕርናም።

15 ህትን ነኡ ሆሮን ሙረሞበእ ገለት ክትመ ኢስ አዲን መገኒሃ ሆንጠህንሶ፤ ሁኩንን ሱዕሚህሰ መስከርታ አፌሃ ላልቹ።

16 ጡመ ጠወ አኡለከ ዮህዕኔርቹ ዎሎ መኒን ቤቀሙ ሀቦኖቹ፤ መስንትሰ ህትኔ ክትሙ መገኑ ሙንዲሲሰኖሃን።

17 አዕኑ አዎንስታህዕኔሁኑኡተ አዘዘሜ፤ ሹምነትሃሰ ጠገሜ፤ መስንትሰ እስ ፎልክዕኔተኔሃ መሰለ ኣታአራ እኮቤቺሃ ጠረኝት ክዕኔተ አገርታህዕኔ፤ አዘዘንቴንተሰጎር ሆጉሰ ሙንዲኖን አታአ፤ አዘዘንቴንባች ሆጉሰ ሙንዲኖን አታበአ፤ ሁኩንን ክዕኔሃ ጡመሃበአ።

18 አዕኑ ኔሳሃ ዱአ አዕዬኔ፤ ነኡ ነጠ ቀልቢን ሄኡኔ አጥራመንት ደንጋም፤ ህትን ጉዕመ ጠዋንን ጡመገ ሄኢሃ ሄዕላንታም።

19 ክዕኔቤቹ ደዕል ፈንቀሎተ በትሴን ዱአ አቶኖተ ጠረኝሽ ኩላንክዕኔ።

መጨረሻ ዱአለከ ወገሬት

20 ዘላለሚሃ እሆኖ ወኣድ ላገ ቄጊን ሆላተሰ ሎረ ዜማንቹ እኮ ቀርቹ ኢስ ሬሆች ኬሾ ወገሬት መገኑ

21 ሰውትሰ ዊንሸቴነንተረ እኮኖተ ጡመ ጠዋሃ ጉዕሚንከ ቅጥአኡንክዕኔ፤ እሱ ሙንዲሲሰኖርቹ መሲህ ኢስ አዲን ክዕኔኡን አኡን፤ መሲህ ኢሲንከ ዘላለሚች ዘላለመ ኢላ ኬዕምኙ እሁን፤ ኣሚዕን።

መጨረሻ

22 አመኤ አሶ! ኩ ከተቦንክዕኔ ሶህኑት ገበንቹ እኮቤቺሃ ሸዘነአ ላገተ አታዕለን ቶጎኖተ ኡጫንክዕኔ።

23 አመኔቤቱ ጥማቶስ ኡሱርች ገፈረሙስ ደጎኖተ ሀሳም፤ እስን ደዕል ኢቤቹ አሜቾጎር አኒሁ እሲንን ሜጡብ ክዕኔተ ለኦተ አሚታም።

24 አዎንስታህዕኔሁኑኡተለከ አመዕናኖተ ጉዕሚንከ ወገሬትኤ ኩሌስ፤ ጣሊያን ባዲች አሜቶ አመዕናኑት ወገሬትሰ ሶኮህዕኔ።

25 መገን ኣሰቱት ጉዕሚንከክዕኔ እኩን፤ ኣሚዕን!

ሃዕር ወኣድ መጻፈ

Alaba-K'abeena: ሃዕር ወኣድ መጻፈ (New Testament)

copyright © 2025 The Word for the World International

Language: Alaba-K'abeena (Alaba-K'abeena)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

740fd658-7c09-56dd-a374-995d21c2d66d